

Sanaartornermi neqerooruteqartitsisarneq pillugu Inatsisartut inatsisissaattut siunnersuut.

(Ineqarnermut, Attaveqarnermut Angallanermullu Naalakkersuisoq)

**Saqqummiussissut
Siullermeerneqarnera**

Matumuuna Naalakkersuisut sinnerlugit sanaartornermi neqerooruteqartitsisarneq pillugu Inatsisartut inatsisissaattut siunnersuut saqqummiuppara.

Inatsisissatut siunnersuutip atuutilerneratigut suliariumannittussarsiuussisarnermut inatsit 1992-imeersoq maanna atuuttoq neqerooruteqartarnermut inatsimmit nutaamit taarserneqassaaq. Siunnersuut taamaallaat pisortat sanaartugassaannut aamma sanaartugassanut pisortanit tapiiffigineqartunut isumaqatigiissutinut atuutissaaq, tassanilu aamma sanaartugassanut suliassaqarfimmi neqerooruteqartitsisarnermut sinaakkutissat aalajangersarneqarput. Neqerooruteqartitsisut namminersortut inatsimmik malinninnissamik pisussaaffilerneqanngillat, kisiannili inatsit malissallugu namminneerlutik toqqaasinnaapput.

Siunnersuummi sanatitsisup pisortat sanaartugassaataannik neqerooruteqartitsinermini sianigisassaattut tunngavissat aalajangersarneqarput.

Siunnersuutip atuutilerneratigut sanaartugassanut suliassaqarfimmi isumaqatigiissutit neqerooruteqarfigitinneqartarneri tamanut ammasumik imaluunniit killilimmik suliariumannittussarsiuussinikkut tunngaviusumik pisartussaapput, kiisalu suliakkiissutissamik tunniussinissamut “neqeroorut akikinnerpaaq” imaluunniit “neqeroorut aningaasaqarnikkut iluanaarnarnerpaaq” tunngavigineqartartussaalluni. Taamaalilluni akit kisiisa pinnagit ilaatigut pissutsit pitsaassutsimut kusanassutsimulluunniit pingaaruteqartut unammilleqatigiissutigineqartarnissaat eqqarsaatigineqarpoq. Tunniussinissamut “neqeroorut akikinnerpaaq” tunngavigineqarsimappat, akikinnerpaamik neqerooruteqartup saniatigut allanut isumaqatiginninniartoqarsinnaassanngitsoq inatsimmi aalajangersarneqarpoq. Tamatumali akerlianik “neqeroorut aningaasaqarnikkut iluanaarnarnerpaaq” tunngavigineqarsimappat, neqerooruteqartut isumaqatiginninniarfigineqarsinnaassapput.

Tamatuma saniatigut siunnersuutip atuutilerneratigut Naalakkersuisut Neqerooruteqartitsisarneq pillugu Maalaaruteqartarfimmik, eqqartuussivinnut assigusumik ilusilimmik suliatigut immikkut ilisimasaqartumik, neqerooruteqartitsisarnerup iluani sulianut pisariusunut aalajangiisartussamik pilersitsisinnaalissapput.

Taamatut oqaaseqarlunga sanaartugassanut suliassaqarfimmi neqerooruteqartitsisarneq pillugu Inatsisartut peqqussutissaattut siunnersuut Inatsisartuni kajumittumik suliassanngorlugu tunniuppara. Siunnersuut aappassaanneeraneqannginnermini Inatsisartut Attaveqarnermut Ineqarnermullu Ataatsimiititaliaanit suliarineqassasoq siunnersuutigineqarpoq.